

廿二史考異

元史十

廿二史攷異九十五

錢大昕學

伯顏傳

蒙古八隣部人 按輟耕錄八隣爲蒙古七十二種之

一祕史孛端察兒妻阿當罕生子曰巴阿里歹後爲
茂年巴阿鄰氏卽八隣也

會祖述律哥圖 元明善撰淮安忠武王碑云术律哥
圖贈太尉追封淮安王諡武定阿刺贈太傅追封淮
安王諡武康曉古台贈太師追封淮安王諡武靖

從宗王旭烈兀開西域 旭烈兀睿宗第六子也至元

辨偽錄今照烈大王即元皇帝親弟鎮守西域在尋

思干西南雪山之西使命往還來往不絕

通判權州事趙昂發昂當作昂或作卯

乃命議事官張羽等羽字飛卿秦中人

調淮東都元帥字魯歡 即博羅歡

遣程鵬飛洪雙壽等入宮洪雙壽即洪雙叔也

又令軍士有捕塔刺不歡之獸而食者塔刺不歡即

塔刺不花獸名狀如龍見祭祀志

阿木傳

生擒其將趙范二統制即趙文義范興也伯顏傳云

伯顏手殺文義擒范興殺之則文義非生擒矣二傳

互異

追封河南王 按阿朮諡武定其子不憐吉反官至河南行省左丞相封河南王傳皆失書

土土哈傳

諸王脫脫木失烈吉叛 失烈吉卽河平王昔里吉也

脫脫木或作脫帖木兒

見楚王牙忽都傳

攷宗室表睿宗第

十子歲都哥大王之孫有荆王脫脫木兒疑卽其人
也又睿宗第六子旭烈兀大王之孫亦有脫脫木兒

王

又敗寬折哥等 伯荅兒傳作寬赤哥思

宗王乃顏叛陰遣使來結也不干勝刺哈 勝刺哈卽

濟南王勝納合兒或作勝納哈

見諸王表

亦作聲刺哈兒

見孝

秃傳也不干或作也不堅

見楚王牙忽都傳

攷宗室表幹赤

斤國王位下闕列堅太子位下合丹大王位下俱有
也不干大王今據世祖紀至元廿四年七月罷乃顏
所署益都平凜也不干河間分地達魯花赤及勝納
合兒濟南分地所署官也不干分地在河間則爲闕
列堅之曾孫無疑

有詔進取乞里吉思 地理志作吉利吉思

師至欠河 地理志作謙河

身至玉龍罕界饋餉安集之 玉龍罕疑卽玉龍峇失

憲宗第三子也

導諸王岳木忽等入朝 卽藥木忽兒

牀兀兒 命尙雅忽禿楚王公主察吉兒 雅忽禿卽

牙忽都

諸王都哇察八兒明里帖木兒等 都哇或作朶瓦或

作篤娃明里帖木兒或作滅里鐵木而宗室表中未

見此二人名

峇里襲封句容郡王 按文宗紀天歷二年正月以牀

兀兒之子蒼鄰蒼里襲父封爲句容郡王十一月以
蒼鄰蒼里知行樞密院事卽此蒼里也

紐璘傳

子也速蒼兒 世祖以屬行樞密院火都赤 按下文
有行樞密副使忽敦疑卽一人

長子南加台官至四川行省平章政事 卽襲加台也
文宗朝以拒命見誅

阿剌罕傳

祖撥徹 按撥徹累贈司徒追封曹國公諡忠定進封
曹南王也柳干贈中書右丞相追封曹國公諡桓毅

進封曹南王傳失書

幼隸皇子岳里吉爲衛士 按宗室表太宗七子無岳里吉名表又引憲宗紀太宗以子月良不材故不立爲嗣岳里吉豈卽月良之轉聲乎

歲乙未從皇子闕出忽都禿南征 按忽都禿別自一人非皇子也太宗紀作胡土虎

四年春授上萬戶從都元帥阿朮伐宋 按阿刺罕從阿朮南伐乃至元四年事此傳四年之上當有至元字中統紀元止于四年此有五年十年十一年十二年十三年十四年十八年皆至元之年也

行至慶元卒于軍中 按阿剌罕贈太師追封曹國公

諡宣武

虞集曹南王世德碑作武定

進封曹南王諡忠宣傳俱失

書

子拜降襲 按許有壬撰曹南王神道祠堂兩碑俱云

子男二人長也速迭兒山東河北蒙古軍大都督集

賢大學士次脫歡中書平章政事江南行臺御史大

夫無所謂拜降者虞集曹南王世德碑云阿剌罕既

歿子也速迭兒幼拜降也速迭兒之兄也襲世職爲

萬戶總其軍然則拜降乃阿剌罕昆弟之子非其子

矣史以拜降爲阿剌罕子誤

李恒傳

其先姓於彌氏唐末賜姓李世爲西夏國主 按西夏

之先本拓跋氏於彌與拓跋音相近蓋元時國俗

之語吳澄換李世安

卽散木解

墓誌云公西夏賀蘭於彌

部人也

子散木解江西行省平章政事 據吳澄墓誌知散木

解一名世安囊加真一名世雄遜都台一名世顯誌

稱世安子五人長峴翰林直學士嶼懷遠大將軍襲

萬戶峴疑卽薛徹干嶼疑卽薛徹禿也元時唐兀畏

吾人往往有兩名

徹里傳

燕只吉台氏 蘇天爵名臣事略云衍只吉氏神道碑
作燕只吉臺氏

九年召入爲中書平章政事十月以疾薨 按成宗紀
大德十年閏正月以江浙行省平章闍里爲中書平
章政事闍里卽徹里也宰相表亦於大德十年書徹
里名惟姚燧撰神道碑云九年召入平章中書而名
臣事略因之蓋被召在九年而入中書則在十年俱
未誤也但碑文召入平章中書之下云贊右丞相專
力一心變和庶政纔一寒暑遂疾不出云云而後云

十月八日薨則徹里之卒仍在太德十年非九年矣
事略于九年入拜中書平章政事之下卽云是歲薨
蓋未細釋元文之故傳又承事略之誤而不知與表
紀自相抵牾也

不忽木傳

燕真未及大用而卒 按燕真後贈太傅河南行省左
丞相追封晉國公諡忠獻其父海藍伯亦追封河東
郡公史失書

河東按察使阿合馬 此又一阿合馬非姦臣傳之阿
合馬也

吐土哈求欽察之爲人奴者 卽土土哈

帝每顧侍臣稱塞陞旃之能 疑卽賽典赤

上柱國魯國公諡文貞 按順帝時又加贈太師進封

東平王

完澤傳

父線真中統初從世祖北征四年拜中書丞相 丞相

上脫右字線真以宣徽使終後贈太師追封秦益國

公諡忠獻傳失書

年五十八 完澤有子長壽大德九年任中書右丞傳

亦失載

阿魯渾薩理傳

子三人長岳柱 趙孟頫撰趙國文定公碑作父著

子四人長普達次安僧次仁壽 按岳柱子四人傳惟

載其三次趙孟頫撰碑稱阿魯渾薩理孫男四曰普

達荅里麻安僧則傳所遺一人當卽荅里麻也岳柱

昆弟三人買住旣早卒久著又以兄之子爲後皆必

無嗣則荅里麻亦岳柱之子無疑矣碑不載仁壽者

孟頫卒於至治初撰碑之時仁壽尙未生也

囊加歹傳

祖合折兒 按趙孟頫集有殊祥院使執禮和台封贈

三代制曾祖哈直兒贈太保追封梁國公諡莊襄卽
合折兒也祖馬察贈太傅追封梁國公諡桓武卽麻
察也父囊加贈太師追封浚都王諡武忠卽囊加友
也

忙兀台傳

祖塔思火兒赤 按傳失載忙兀台父名今東平州有
忙兀臺公光昭先祖神道碑云塔思子鐵里哥襲父
職授行軍千戶鐵里哥子曰札刺兒台眞州達魯花
赤福建等處鹽課市舶都轉運使曰雍乞刺台曰亦
乞里台襲祖職遷浙西道宣慰使忙兀台其季子也

完者都傳

子十四人皆仕而帖木秃古思別里怯都尤顯 按完者都十四子曰帖木秃古思襲高郵上萬戶府達魯花赤遙授右丞淮東西宣慰使曰別里怯都江浙行省左丞燕南道廉訪使曰插都無錫州達魯花赤曰不花曰別里長興州達魯花赤曰徹里帖木兒高郵打捕屯田提舉司達魯花赤曰伯不花曰幢合兒曰出不昆曰入刺曰黑黑曰潮潮曰佛保曰和尚見程鉅夫所撰林國武宣公碑

步魯合答傳

蒙古宏吉刺氏 按步魯合荅乃按竺通之孫系出雍
古氏非宏吉刺氏雍古爲色目之一種非蒙古史誤
祖按主奴 卽按竺通

父車里 卽徹理

次黑子次帖木兒 黑子卽黑梓一名國寶帖木兒一
名國安黑子之子那懷卽世榮也

昂吉兒傳

姓野蒲氏世爲西夏將家歲辛己父甘卜率衆歸太祖
卽也蒲甘卜也蒲甘卜傳附書昂吉兒事昂吉
兒傳又追敘甘卜事兩傳重出而有無簡之殊當去

彼存此

分木華黎及阿木所將河西兵俾將之 此木華黎乃
察罕之子萬戶木花里非國王木華黎也

翰林承旨和魯火孫 卽和禮霍孫

哈刺解傳

哈魯氏 危素撰合魯公家傳云合刺解公系出合魯

氏合與哈聲相近父八合賜名與樂拔都贈沿海翼管軍萬

戶追封汝南郡侯史失載其父名

忽刺出傳

祖赤脫兒 卽直脫兒也列傳第十卷已爲立傳并附

及忽刺出事矣此傳重複當刪

重喜傳

祖塔不已兒 此與第十卷塔不已兒傳重複當刪

完者拔都傳

欽察氏其先彰德人 按欽察內附之後有徙居彰德者故完者拔都有林國公之封

李蘭奚傳

雍吉烈氏世居應昌 卽宏吉刺氏

暗伯傳

乃客居於于闐宗王阿魯忽之所 按宗室表察合台

之孫有阿魯忽大王

亦憐真班湖廣省左丞 亦憐真班有傳在第三十二
卷官至湖廣行省左丞相終于江西行省左丞相非
左丞也

撒吉思傳

回鶻人其國阿大都督多和思之次子也 按多和思
亦暉欲谷之裔與亞思弼為昆弟

初為太祖弟斡真必闡赤 斡真即斡赤斤也

斡真崇長子只不干蚤世適孫塔察兒幼庶兄脫迭狂
恣欲廢適自立 按宗室表只不干大王之兄尚有

幹端大王表亦無脫迭名

月乃合傳

曾祖帖木爾越哥仕金爲馬步軍指揮使官名有馬因以馬爲氏 按馬祖常傳云高祖錫里吉思金季爲鳳翔兵馬判官子孫因其官以馬爲氏祖常撰禮部尙書馬公神道碑云公諱月合乃卽月乃合又作月忽乃父錫

里吉思仕金爲鳳翔兵馬判官死節官名有馬因以立氏與此傳互異祖常爲月乃合之孫敘其先世似不應誤今攷金史忠義傳馬慶祥字瑞寧本名習禮吉思先世自西域入居臨洮狄道以馬爲氏習禮吉

思卽昔里吉思也

亦作錫里吉思

史旣系以馬姓則以馬立

氏由來已久昔里吉思又以兵馬判官死節子孫引以爲榮故歸之昔里吉思耳且昔里吉思父名卽有馬字若以己官命氏又於父諱有嫌故知馬氏之始當以此傳爲正也

祖把掃馬野禮屬徙靜州之天山 按馬祖常傳作靖州金史忠義傳作淨州以金元二史地理志證之當從淨爲是

父昔里吉思鳳翔府兵馬判官死國事贈恒州刺史

按元好問撰恒州刺史馬君神道碑云子男三人長

三達次鐸刺次福海不見月乃合之名蓋金元之際
多一人而兩名也

至仁宗朝詔行科舉曾孫祖常博學能文章鄉試會試
皆爲舉首 按馬祖常旣別爲立傳此復附見六十
餘言贅矣當云曾孫祖常自有傳

鐵連傳

然必先詣拔都蒙哥鐵木王所 二人皆木赤太子之
子蒙哥鐵木宗室表作忙哥帖木兒

愛薛傳

西域弗林人 按世祖紀至元十年改回回愛薛所立

京師醫藥院名廣惠司則愛薛亦回回人拂林則其所居之地也拂林古大秦國故有秦國公之封

也里牙秦國公 文宗紀作野里牙

臚合翰林學士承旨 文宗紀作典哈

和尚傳

玉耳別里伯牙吾台氏 按伯牙吾台者欽察之族玉

耳別里則欽察所居地名玉里伯里也然則和尚乃

欽察人

迦魯納荅思傳

是年八月卒 按迦魯納荅思之後稱魯氏子鐵柱靖

州路達魯花赤孫重喜崇仁縣達魯花赤

三

元史十終

元史十一

廿二史攷異九十六

錢大昕學

小雲石脫忽憐傳

獵真官至榮祿大夫中書省平章政事 按宰相表自

至元二十九年至大德三年俱有平章政事刺真卽
獵真也

子察乃中書省平章政事 按宰相表至大元年閏十

一月至四年有平章政事察乃泰定三年四年又有

平章政事察乃

察乃子十人老章知樞密院事撒馬篤中書省參知政

事 按察乃十子曰李李貫河東道宣慰使曰老漢
曰亦鞏眞遼陽行省左丞曰老章知樞密院事封和
寧王曰草地里眞定路達魯花赤曰捏烈秃宮傳曰
荅刺海曰羅羅江東道廉訪使曰撒馬篤中書參知
政事曰伯顏帖木兒光祿少卿

也先不花傳

與蒙哥撒兒密贊謀議 卽忙哥撒兒

秃魯歷事四朝 三公宰相表竝作秃忽魯

追封廣陽王 按秃魯諡清獻史失書

子阿榮由宿衛起家 當云阿榮自有傳出宿衛起家

以下三十七字皆可刪

鐵哥术傳

曾祖父達釋 按下文云達釋之子野里术又云鐵哥
术野里术之長子則此云曾祖父者誤也

塔出傳

塔出布兀刺子也 按此傳不言其氏族布兀刺亦不
見於它傳

阿荅赤傳

阿荅赤阿速氏 杭忽思傳作阿塔赤

父昂和思 卽杭忽思

阿里不哥叛從也見怯等征之 杭忽思傳作也里可
哈刺哈孫傳

曾祖啓昔禮始事王可汗脫幹璘 太祖紀汪罕名脫
里脫幹璘卽脫里語有緩急爾王可汗卽汪罕

王可汗與太祖約爲兄弟 按太祖紀尊汪罕爲父蓋
約爲父子非約爲兄弟也

賜號蒼刺罕 按啓昔禮子博理察孫囊加台皆襲蒼
刺罕之號劉敏中撰順德忠獻王碑云啓昔禮諡忠
武博理察諡忠毅囊加台諡忠愍三世皆贈太師追
封順德王

祖宗之制非親王不得加一字之封 按世祖之世燕
秦梁晉諸王皆皇子也自武宗嗣位而越王禿剌始
以宗室得封由是齊楚幽寧濟定以宗族郇魯以駙
馬皆得一字之封皆自禿剌啓之

阿沙不花傳

牙牙後封康國王生六子 按牙牙子六人曰李別舍
兒曰和者吉贈太保追封榮王諡忠武曰不別遙授
甘肅行省右丞曰幹禿蠻曰阿沙不花曰脫脫史有
傳者惟阿沙不花脫脫二人和者吉之子四人曰燕
不鄰遼陽行省平章政事太保興國公追封興寧王

諡忠襄曰燕八思提大司徒曰別不花嶺北行省平章政事曰伯撒里太師中書右丞相永平王列傳略不及之

諸王迷里帖木兒 武宗紀作明里鐵木兒

拜住傳

追封東平王諡忠獻至正初改正仁孚道一德佐運功臣餘如故 按至正中進封鄆王諡文忠夫人妥妥輝諡貞靜又進封安童魯王兀都帶堯王竝見黃潛所撰鄆文忠王碑史惟載改賜功臣號而不及封諡亦討論之疏也

子篤麟鐵穆爾 按黃潛碑拜住子二人長荅刺麻碩

理

慶定紀作荅
見麻失里

宗仁蒙古衛親軍都指揮使次因牙

納碩理文宗時賜名篤麟鐵穆爾襲職環衛宗仁蒙
古衛親軍都指揮使歷太宗正府扎魯忽赤宣徽使
和樞密院事大司農史惟載篤麟鐵穆爾一人又不
著其官宋景濂嘗受業於晉卿豈於其師之文集亦
未寓目邪總裁之失其職如此曾脫脫之不若矣

曲樞傳

曲樞 紀表皆作曲出

祖阿達台父質理花台世贈功臣追封王爵 按阿達

台質理花台俱追封祁連王

後以疾薨于位 按曲出後贈太師追封廣陽王諡忠

惠子伯帖木兒贈太傅追封文安王諡忠憲

康里脫脫傳

武宗與大將朶兒荅哈語及之 土土哈玉哇失傳作

朶兒朶懷世祖紀作朶兒朶海牙忽都傳作朶兒朶

哈

時諸王秃列等侍 卽越王秃刺也

尋召拜中書左丞相至大三年尚書省立遷右丞相四

年正月復爲中書左丞相 按武宗紀脫脫未嘗入

尚書省其爲尚書右丞相者乃脫虎脫也至大四年
正月武宗崩仁宗命罷尚書省以丞相脫虎脫等變
亂舊章流毒百姓命中書省臣參鞠皆伏誅安得有
復爲中書左丞相之事乎宰相表於至大元年二年
三年書中書左丞相脫脫此康里脫脫也又於至大
二年書尚書左丞相脫脫三年書尚書右丞相脫脫
此別是一人本紀所云脫虎脫也傳誤以爲一人而
賢否混淆矣

時帖赤先爲大夫 卽鐵失

燕鐵木兒傳

攷異

元史十一

五

辛酉以燕鐵木兒兼奎章閣大學士領奎章閣學士院
事 此事據文宗紀在至順三年二月辛酉傳繫于
二年十一月誤也又據上文書十一月癸未癸未至
辛酉三十九日不得在一月之內

伯顏傳

蔑兒吉解氏 按馬祖常太師秦王佐命元勳碑作滅
兒吉解氏危素送彭公權序稱脫脫爲蔑里期公

曾大父揆馬哈兒 按馬祖常碑揆馬哈兒贈太傅追
封梁國公進封陽翟王諡敬簡加贈太師追封淮陽
王諡忠靖

大父稱海 按稱海官領軍百戶贈太師追封梁國公
進封河南王諡莊順又進封淮王諡忠襄

父謹只兒 按謹只兒贈太師追封河南王進封鄭王
諡忠懿

構陷邲王徹徹篤 宗室諸王三表脫脫傳皆作徹徹
禿

馬札兒台傳

泰定四年拜陝西行臺治書侍御史 按文宗紀天歷
元年河南行省召陝西行臺侍御史馬札兒台不至
二年八月以馬札兒台爲上都留守馬札兒台前爲

陝西行臺侍御史坐塗毀詔書得罪以其兄伯顏有功故特官之傳不載其拒命獲罪又起爲上都留守一節諱之也然天歷起兵實爲畔逆西臺助上都起兵允合臣子之義元時史臣或未免曲筆明初修史諸人何亦昧於上下之分沒而不書乎若囊加台等有死無二元史竟不爲立傳何以勸忠義之士宋王兩公不獨無史才并無史識矣

乃蠻台傳

木華黎五世孫 按乃蠻台之曾祖孛魯卽木華黎之子實止四世

七年拜嶺北行省右丞 按此文在大德五年之下則
是大德七年矣攷大德十一年始置和林行省皇慶
元年改爲嶺北省是大德以前未有嶺北行省傳文
當有脫誤

奉命送太宗皇帝舊符皇兄之寶於其後嗣燕只哥解
按木赤察合台皆太宗之兄燕只哥解必其後也
而宗室世系表不著其名泰定紀泰定四年諸王燕
只吉台襲位遣使來朝蓋卽其人

朶兒只傳

木華黎六世孫 按朶兒只父脫脫祖撒蠻曾祖速渾

察高祖孛魯距木華黎止五世

天歷元年朶羅台國王自上都領兵至古北口 按朶

羅台爲乃蠻台之兄當亦忽速忽爾之子

吳王朶爾赤 按宗室表哈赤溫大王之後有吳王朶

列捏吳王木喃子未見朶爾赤名

朶兒直班傳

木華黎七世孫 按朶兒直班父別理哥帖木爾祖碩

德會祖乃燕高祖速渾察五世祖孛魯距木華黎止

六世

黜御史大夫懿憐眞班 卽亦憐眞班

阿魯圖傳

父木忽刺 當作木刺忽

太平傳

國王朶而只爲左丞相 卽朶兒只

鐵木兒塔識傳

國王脫脫之子 按元時惟木華黎後裔得襲國王之號鐵木兒塔識系出康里氏其父脫脫雖追封和寧王不得蒙國王之稱也

時修遼金宋三史鐵木兒塔識爲總裁官 按遼史總

裁官六人中書平章政事鐵睦爾達世中書平章政

事賀惟一翰林學士承旨張起巖翰林學士歐陽元
集賢侍講學士兼國子祭酒呂思誠翰林侍講學士
揭傒斯金史總裁官八人御史大夫帖睦爾達世中
書平章政事賀惟一翰林學士承旨張起巖翰林學
士歐陽元翰林侍講學士揭傒斯治書侍御史李好
文崇文太監楊宗瑞禮部尚書王沂宋史總裁官七
人中書平章政事帖睦爾達世御史大夫賀惟一翰
林學士承旨張起巖翰林學士承旨歐陽元治書侍
御史李好文禮部尚書王沂崇文太監楊宗瑞遼史
進表在至正四年三月金史進表在四年十一月宋

史進表在五年十月據宰相表鐵木兒塔識以至正
五年七月爲御史大夫太平即賀亦以五年十月爲
御史大夫則表上金史之時鐵木兒塔識尚爲平章
何以卽稱御史大夫及次年宋史告成已授御史大
夫何以轉稱平章太平拜御史大夫時當已改名而
表仍書賀惟一皆可疑也

夔夔傳

祖燕眞事世祖從征有功 燕眞事已見不忽木傳此
重出

回回 擢中書右丞力辭還第 按宰相表天歷元年

九月至十一月有右丞回回名

理本作回四誤

蓋任事未久

卽辭位也

以疾卒

按回回子五人祐童濟寧路總管帖木列思

江南行臺治書侍御史於史例當附書

自當傳

蒙古人也

按自當爲別兒怯不花之兄當云燕只吉

解氏

會次三皇后殂命工部撤行殿車帳皆新作之

按順

帝紀至正七年隆福宮三皇后宏吉刺氏木納失里

薨疑卽此事傳誤繫之秦定二年後耳

帝欲加號太后曰太皇太后命朝堂議之自當獨曰太
后稱太皇太后於典禮不合衆皆曰英宗何以加皇
太后曰太皇太后自當曰英宗孫也今上子也太皇
太后之號孫可以稱之子不可以稱之也議遂定

按傳書此事於文宗卽位之前則亦在秦定朝也攷
秦定初立時母妃久已先歿故紀書至治四年十二
月請皇考皇妣諡于南郊尊皇妣晉王妃曰宣懿淑
聖皇后而后妃傳載秦定四年冊文有云仰徽音之
如在慨至養之莫加是秦定帝未嘗加尊其母爲太
后安得有加號爲太皇太后之事乎以太后爲太皇

太后惟見于順帝之世使自當果有此議當在順帝時朕議而不從又不當云議遂定也

秦不華傳

伯牙吾台氏 按伯牙吾台欽察之氏則兼善蓋欽察人也傳又云世居白野山白野卽伯牙之轉蓋蒙古諸部人往往以所居地爲氏

初名達普化文宗賜以今名 予見至正三年松江府廟學記題云紹興路總管兼管內勸農事知渠堰事秦普華篆額普華卽不華也譯音無定字達與秦不遇音之轉普化與不華北音亦無異兼善登第時榜

書達普化後來受制命又作秦不華故史以爲文宗
賜名然當時士大夫多以達兼善稱之或稱爲達祕
書兼善亦自題秦普華可見賜名之說未足深信

年四十九時十二年三月庚子也 翁方綱云秦不華
死台州本傳在壬辰三月而鐵厓挽詩注云辛卯八
月歿于南洋

余闕傳

追封幽國公諡忠宣 按程國儒序青陽集云諡文忠
追封夏國公張紳以爲初贈夏國公諡忠愍改贈幽
國公諡忠宣丁鶴年有過安慶追悼余文貞公詩宋

景濂手定元史而集中余左丞傳亦作文忠未審孰
得其實

荅里麻傳

大父撒吉斯 卽撒吉思有傳在第二十一卷

卜顏鐵木兒傳

唐兀吾密氏 按察罕傳稱唐兀烏密氏北人讀吾如
烏蓋同族也李恒傳稱於彌氏與烏密聲亦相近

星吉傳

曾祖朶吉祖搠思吉朶而只父搠思吉 按朶吉贈河
南行省平章政事追封秦國公改封雍王搠思吉朶

而只贈甘肅行省平章政事追封代國公改封涼王
朔思吉贈陝西行省平章政事追封趙國公改封邠
吉王

年五十七 按星吉贈江西行省丞相追封威寧王諡
忠肅

亦憐眞班傳

父俺伯 卽賄伯

廉惠山海牙傳

預修遼宋金三史 今按遼史前列纂修官有兵部尚
書廉惠山海牙名而金宋二史無之其爲兵部尚書

又傳所失書也

月魯不花傳

蒙古遜都思氏 按月魯不花太祖功臣赤老溫之五世孫也赤老溫子納圖兒御位下必闕赤納圖兒子察刺隨州軍民達魯花赤察刺子忽納襲父職官至江東廉訪使追封陳留郡侯謚景桓脫帖穆耳則忽納次子也以蘄縣 戶府東平等處管軍上千戶所達魯花赤分戍自明而越

達禮麻該理傳

廿四年朝廷以前中書平章政事塔失帖木兒來爲留

守 塔失帖木兒蓋別兒怯不花之子下文或云塔
世帖木兒或云達世帖木兒其實一人也

元史十二

廿二史攷異九十七

錢大昕學

耶律楚材傳

遼東丹王突欲八世孫 按列傳自第五卷特薛禪以

下至第三十二卷皆蒙古色目人自第三十三卷耶

律楚材以下至第七十五卷皆漢人南人也耶律石

抹系出契丹粘合奧屯系出金源當時目爲漢人故

在漢人南人之列高智耀李恆李楨本西夏人國語

謂之唐兀氏馬祖常本出雍古部皆色目也太平漢

人而賜姓蒙古氏故皆在蒙古色目之列趙世延乃

按竺邇之孫系出雍古楊朶兒只西夏人皆當入色
目而誤與漢人同列此則史臣之失檢也

父履以學行事金世宗特見親任終尚書右丞 金史

有移刺履傳卽楚材之父也移刺耶律聲本相近陳
旅述律復舊氏序稱金人改耶律爲曳刺述律爲石
抹曳刺謂前馬之卒也石抹謂臧獲也經世大典序
錄云守狴犴防囚徒者曰禁子追呼保任逮捕者曰
曳刺則曳刺非美名矣食貨志歲賜篇有曳刺中書
兀圖撒罕里卽吾圖撒
合里也謂楚材也蓋元初猶沿金人
之舊稱後來皆易耶律字矣

粘合重山傳

金源貴族也

按金史百官志圖語解俱不載粘合氏

或云卽粘割之譌

金史列傳有粘合荆山
衛紹王紀有粘合合打

楊惟中傳

初滅金時以監河橋萬戶劉福爲總管福貪鄙殘酷虐
害遺民二十餘年惟中至召福聽約束福稱疾不至
惟中設大梃於坐復召之使謂福曰汝不奉命吾以
軍法從事福不得已以數千人擁衛見惟中惟中卽
握大梃擊仆之數日福死 按趙璧傳河南劉萬戶
貪淫暴戾其黨董主簿尤恃勢爲虐強取民女有色

者三十餘人璧至按其罪立斬之劉大驚時天大雪因詣璧相勞苦且酌酒相賀曰經略下車誅鉏強猾故雪爲瑞應璧曰如董主簿比者尚有其人俟盡誅之瑞應將大至矣劉屏氣不敢復出語歸臥病而卒時人以爲懼死所云劉萬尸者卽劉福也壬子歲世祖立經略司於汴以忙哥史天澤楊惟中趙璧爲使惟中久當樞軸遇事能斷而璧實助之然兩傳言劉福事互異

張柔傳

繼而道潤爲其副賈瑀所殺 按金史苗道潤之死在

興定二年卽戊寅歲也此傳先書道潤被殺而後書
戊寅似未甚核

金主敗走睢陽 按史臣紀事不當用古地名此傳金
主走睢陽金主走汝南當時無此郡縣名也

史天倪傳

乃以天倪爲萬戶 按劉黑馬傳太宗卽位始立三萬
戶以黑馬爲首重喜史天澤次之姚燧撰邱澤神道
碑云國初以二萬戶鎮撫中夏右則劉伯林軍秦左
則粘合重山軍燕顧成謂太宗則益太尉史忠武公天
澤爲眞定河間濟南東平大名五路萬戶于中然則

攷異

元史十二

三

太祖之世漢軍萬戶祇有劉伯林粘合重山二人據此傳似史天倪在太祖時已有萬戶之名予嘗見史秉直神道碑及史氏慶源碑皆立于太宗朝其稱天倪但云河北西路兵馬都元帥是天倪未嘗授萬戶可以證此傳之誤

實與蒲瓦兵遇於南門合達兵自北奄至實兵敗竟爲所執 按嚴實兵敗被執得脫事不見於本傳

權 又徙河間卒 按史權諡武穆權子燿官至大司農諡義襄傳俱失書

史天祥傳

降其北京留守銀荅忽 太祖紀作寅荅虎

授蒙古漢軍兵馬都元帥總十二萬戶鎮河中 按此事在太祖癸未歲攷太祖初置蒙古左右手及中軍萬戶以木華黎博爾朮納牙爲之漢軍則有劉伯林粘合重山二萬戶此十二萬戶未詳何時增置也

董俊傳

文用 子八人士貞士亨士楷士英士昌士恆士廉士方 按列傳附載子孫必其人名位顯貴或才德可稱否則似家乘之文非國史矣董氏爲元世臣士貞等八人自當登名仕版史家旣失於稽攷而徒覲列

其名不已贅乎至如文忠之子士珍官至中書參知政事御史中丞贈太傅追封趙國公諡清獻士恭官陝西行臺中丞士珍子守簡官中書左丞御史中丞追封冀國公諡忠肅傳無一語及之又何其疏也又列傳敘述先代亦必有功德可稱方表而出之王鶚之曾祖孫成祖立父琛三世俱無所表見又未出仕史不應備書其名此必采自謄狀而不知其當刪也

嚴實傳

子忠貞忠濟忠嗣忠範忠傑忠裕忠祐 按忠範以下四人傳不書其事攷至元十二年忠範以工部侍郎

與廉希賢等持國書使宋爲張濡所殺此事之大者
傳不應略而不言也又實之孫度官至甘肅行省左
丞諡貞憲見柳貫集史亦失書

劉伯林傳

與太傅耶律禿懷 卽耶律禿花

黑馬 太宗卽位始立三萬戶以黑馬爲首重喜史天

澤次之 按元史無重喜傳不知其氏族列傳第一
十卷有重

喜此別
是一人以姚燧撰邱澤碑推之疑是粘合重山之族

而重山傳不言授萬戶

石天應傳

子煥中知興中府事執中行軍千戶 按木華黎傳云
以天應子幹可襲領其衆傳無幹可名蓋一人二名
史家不能悉書也

移刺捏兒傳

遼亾金以爲參議留守等官皆辭不受聞太祖舉兵私
語所親曰爲國復讎此其時也 按遼亾之歲歲在

乙巳

卽宋宣和七年

至元太祖建號之年丙寅相距八十餘

歲若遼亾時已能辭官則此時年近百歲必無能與
攻戰之理史家以其系出耶律妄爲此說而不悟年
歲之不符也

致拒戰捏兒出奇兵掩擊斬致 按木華黎王珣傳俱云張致部將高益縛致出降獨此傳云掩擊斬致恐未足信

復從木華黎攻益都 按太祖丙戌歲平益都其時木華黎已前卒矣領兵者木華黎之弟帶孫也

何伯祥傳

追封易國公諡武昌 趙孟頫撰何瑋神道碑云諡忠毅

瑋始襲父職 碑云瑋字仲韞

賽曲赤八都高等還自貶所 曲當作典此賽典赤謂

攷異

元史十二

六

伯顏也本賽典赤贍思丁之孫襲祖號亦稱賽典赤
八都高當爲八都馬辛

改河南行尚書省平章政事卒 碑云年六十有六子
德嚴順德路總管德溫保定翼副萬戶

李守賢傳

弟守忠爲都元帥守河東朝廷以全晉爲要害之地人
心危疑未定非守賢鎮撫之不可 今以李伯溫傳
參攷之知守忠先爲河東南路都元帥知平陽府事
鎮平陽守溫亦以行平陽元帥府事鎮青龍堡丁亥
歲相繼陷沒乃以守賢代之傳失載守忠被執事則

人心危疑之語太無著矣

郝和尚拔郁傳

太原人、按此傳云太原人而其子天挺傳則云出于
朶魯別族自曾祖而上居安肅州父子各立傳而所
書籍貫互異攷王磐撰和上神道碑亦云安肅州安
肅縣人則此傳云太原者誤矣

在郡王迄祇麾下 疑卽朮赤台之子怯台也

子十二人長天益佩金符太原路軍民萬戶都總管

按天益小字山哥

天舉大都路總管兼府尹 按天舉小字長安

趙璫傳

中統元年詔立十道宣慰司以璫爲順天宣慰使 按
中統元年立十路宣撫司璫不預使副之列至三年
立十路宣慰司乃以璫等爲使傳云元年誤也

石抹明安傳

中都旣平加太傅邵國公 按和林廣記所稱太保明
安卽石抹明安也此云太傅恐誤或由太保進太傅
則又漏太保一節矣

子咸得不襲職爲燕京行省 按耶律楚材傳言燕薊
留後長官石抹咸得卜貪暴殺人盈市卽咸得不也

次忽篤華太宗時爲燕京等處行尚書省事兼蒙古漢軍兵馬都元帥 按太宗紀甲午以胡土虎那顏爲中州斷事官畏荅兒傳歲丙申忽都忽大料漢民分城邑以封功臣食貨志忽都虎官人五戶絲壬子年查認過廣平等處四千戶皆謂忽篤華也譯音無定字故紀志傳書名各異

張榮傳

丙申從諸王闊端破宋棗陽仇城等三縣 按太宗紀乙未歲皇子闊端征秦鞏皇子曲出卽闕 伐宋十月曲出圍棗陽拔之則榮所從者當是闕出非闊端也

仇城字疑有誤

世祖卽位封濟南公致仕 按世祖紀中統二年封濟南路萬戶張榮濟南公傳不云授濟南路萬戶史之闕也下文云長子邦傑襲爵孫宏襲邦傑爵所襲卽萬戶之職非襲其公爵

宏襲邦傑爵改眞定路總管 按世祖紀中統三年李璫反詔濟南路軍民萬戶張宏修城塹盡發管內民爲兵以備至元二年山東廉訪使言眞定路總管張宏前在濟南乘變盜用官物詔以宏嘗告李璫反免死罪罷其職徵贖物償官邳州萬戶張邦直等違制

取馬竝處死此二事皆應載於本傳

劉亨安傳

丙戌歲金將移刺副樞攻絳州城陷死之木華黎承制
命亨安領其衆 按木華黎以癸未歲卒子李魯嗣
爲國王上文已書國王李魯矣此卻書木華黎何其
前後不檢照也

趙迪傳

歲壬午改藁城爲永安軍 按王善傳壬午陞藁城爲
匡國軍董俊傳陞藁城縣爲永安州號其軍爲匡國
永安乃州名非軍名也傳誤

王善傳

追封冀國公諡武靖 按虞集撰太原郡伯王思義墓
碑稱善爲趙國武靖公殆由冀而進封趙也思義從
征江西廣東有功官廣東兵馬招討使兼領韶州路
總管善之從子也史亦未見其名

杜豐傳

從國王按察兒攻平陽 元初惟木華黎之後稱國王
而太祖弟斡赤斤亦稱國王斡赤斤之孫塔察兒亦
有國王之稱此按察兒未詳何人也下文又有國王
阿察兒阿按聲相近

田雄傳

朱華黎承制授雄隰吉州刺史兼鎮戎軍節度使行都元帥府事 按攸哈刺拔都傳云真定史天倪平陽李守忠隰州田雄皆失守矣我又棄大原將何面目見主上及國王乎傳不書隰州失守事蓋諱之

張榮傳

歲甲戌從金太保明安降 按石抹明安仕金未嘗爲太保此云金太保誤

張晉亨傳

從國王李羅征益都 卽寧魯

攸異

元史十二

十

張子良傳

歲戊戌率泗州西城二十五縣軍民十萬八千餘口因
元帥阿朮來歸太宗命爲東路都總帥 按阿朮卒
於至元二十四年年五十四太宗戊戌之歲阿朮年
止五歲耳史家何不攷至此後讀虞集所撰張宣敏
公神道碑云歲戊戌因大帥河南忠武王阿朮以歸
國朝始知傳所據者伯生之碑文然伯生亦祇就其
家所述行狀書之未能攷稽於國史也攷察罕傳云
歲戊戌授馬步軍都元帥率諸翼軍攻拔天長縣及
滁壽泗等州乃悟子良本因察罕以降察罕亦封河

南王謚忠宣後人誤以爲阿木耳

七年罷元管戶隸諸郡縣 按此蒙上中統之文然中
統紀元止於四年此傳云七年八年者至元之七年
八年也史脫至元二字

石抹阿辛傳

石抹阿辛迪列紇氏 阿辛卽也先譯音偶異史家遂
分爲二人各立一傳矣石抹本述律氏迪列紇卽述

律之異文

石抹宜孫傳
作迪烈紇

詰旦木華黎解錦衣賞之 按石抹也先傳子查刺歲
癸巳從國王塔思征萬奴癸巳太宗之五年也木華

攷異

元史十二

七

黎卒於癸未歲距癸巳已十年矣此傳云木華黎誤
王檝傳

從三合拔都太傅猛安率兵南征 三合太祖紀作三
模合拔都其號也猛安卽明安紀所稱石抹明安也
帝命闐里畢與皇太弟國王分撥諸侯王城邑 按博
爾木之弟曰幹闊烈闐里必疑卽傳之闐里畢也皇
太弟國王者幹赤斤也

賈居貞傳

子汝立嗣 按史稱某人嗣者皆謂先世有封爵以其
人承襲也賈氏無世職不當云嗣

洪福源傳

戊寅冬十二月太祖命哈赤吉孔刺將兵迎討 哈赤

吉卽哈真也孔當爲札

茶邱 立高麗王祖親屬承化侯爲王 承化侯名溫

永寧公綽之母兄也

鄭鼎傳

宋將余侍郎燒絕棧道以兵圍興元 余侍郎謂余玠

也玠以壬寅歲莅蜀其出兵興元乃在辛亥歲史繫
之甲午歲誤矣

庚戌從憲宗征大理國自六盤山經臨洮下西蕃諸城

抵雪山山徑盤屈舍騎徒步嘗背負憲宗以行 按
憲宗紀無征大理事庚戌歲乃憲宗卽位之前一年
是時三歲無君諸王大臣方議推戴憲宗而立之遠
征大理事所必無其妄明矣攷世祖紀壬子歲奉命
帥師征大理癸丑八月師次臨洮九月次忒剌分三
道以進帝由中道至滿陀城十月過大渡河經行山
谷二千餘里意者世祖征大理時鼎實在行閒史家
誤以爲從憲宗耳

乙未賜白金千兩從世祖南伐 乙未當作己未

制宜 子阿兒思蘭嗣 按武宗紀至大三年十一月

尚書省臣以武衛親軍都指揮使鄭阿兒思蘭與兄鄭榮祖段叔仁等圖爲不軌置獄鞠之皆誣服詔叔仁等十七人竝正典刑籍沒其家此事當載於本傳阿兒思蘭諡敬愍傳亦失書

鄭溫傳

賜名也可拔都 按鄭鼎與溫同時亦賜名也可拔都姓名俱同

汪世顯傳

忠臣鞏昌便宜副總帥 按忠臣諡忠讓見姚燧撰神道碑

元史十三

廿二史攷異九十八

錢大昕學

劉秉忠傳

其先瑞州人也 此遼金之瑞州非宋之瑞州也秉忠
自曾祖以來皆家邢州足迹未抵江南而江西之瑞
州本名筠州宋末避理宗嫌名始改筠爲瑞已在金
南渡之後矣近人修江西通志乃收秉忠入人物何
其謬乎

自忽都那演斷事之後差徭甚大 卽胡土虎那顏
宜依合罕皇帝聖旨 謂太宗也

移刺中丞拘權鹽鐵諸產商賈酒醋貨殖諸事以定宣
課 移刺中丞謂耶律楚材也當云中書不當云中
丞

張文謙傳

追封魏國公諡忠宣 按文謙之大父字贈大司徒魏
國文愍公父英贈太保魏國簡懿公見虞集張氏新
瑩記

郝經傳

祖天挺元裕嘗從之學 梁清遠曰元史差譌不少如
郝經傳載其祖天挺元裕嘗從之學又云元裕每語

之曰子貌類汝祖才器非常元裕者或卽元好問乎
好問字裕之今乃不書其名而書其字又去下一字
何也裕之嘗師天挺見所撰郝先生墓銘文憲忠文
豈未見邪至天挺傳又言受業于遺山元好問更可
笑矣予按梁氏譏史稱元裕爲誤是矣金元之際有
兩郝天挺一字晉卿澤州陵川人卽經之大父元裕
之嘗從之學者也一字繼先安肅州人郝和尚拔都
之子則學于元裕之者梁氏誤以爲一人非也

塔察國王與李行省肱臂相依 塔察卽塔察兒幹赤
斤之孫也李行省謂李瑄

遣使召旭烈阿里不可摩哥 旭烈卽旭烈兀摩哥卽
末哥皆世祖之弟

經還之歲汴中民射雁金明池得繫帛書詩云霜落風
高恣所如歸期回首是春初上林天子援弓繳窮海
羸臣有帛書至元五年九月一日放雁獲者勿殺國
信大使郝經書于眞州忠勇軍營新館 按輟畊錄
載此事本作中統十五年蓋南北隔絕經又被羈未
知至元之改元也史稱伯顏奉詔南伐帝遣使問執
行人之罪宋懼以禮送經歸伯顏南伐在至元十一
年經之還在至元十二年經繫帛書稱中統十五年

正伯顏南伐之歲其明年經始北還傳稱至元五年
又稱經還之歲得之皆誤

姚樞傳

二年拜太子太師 按此傳敘事自世祖卽位以後書
二年四年者中統之紀年也其下書十年十一年十
三年十七年則至元之紀年也有年而無號史失之
從子燧官至翰林學士承旨以文章大家知名諡曰文
當云從子燧自有傳餘皆應刪

許衡傳

以泰和九年九月生 按蘇天爵名臣事略作大安己

已蓋泰和紀元止於八年其明年改元大安矣傳誤
國家自得中原用金大明歷 按此傳載衡領太史院
修授時歷始末幾四百年言文正於歷學非專家其創
法皆出王恂郭守敬二人特假文正領其事以爲重
耳歷議已詳於本志又見郭守敬傳此傳但以一二
語了之可矣

子師可 按衡子師敬官至中書右丞傳竟不見其名
李俊民傳

嘗令張仲一問以禎祥 張仲一名易史當書其名不
應稱字

趙良弼傳

脫兀脫以斷事官鎮邢其屬要結罪廢者交構嫌隙動相沮撓世祖時征雲南良弼馳驛白其事遂黜脫兀脫罷其屬郡大治 按世祖紀以脫兀脫及張耕爲邢州安撫使劉肅爲商榷使邢乃大治張文謙傳文謙與劉秉忠言今民生困敝莫邢爲甚盍擇人往治之乃選近侍脫兀脫尚書劉肅侍郎李簡往三人至邢協心爲治洗滌蠹敝革除貪暴流亾復歸不期月戶增十倍據紀及彼傳則脫兀脫治邢有績可稱獨良弼傳乃言其短此吳穎所謂予奪不常也

執渾都海之黨元帥乞台不花逃立火者誅之 按世

祖紀誅乞帶不花於東川明里火者於西川卽此二

人也

趙璧傳

自是牙老瓦赤不復用 按憲宗紀元年以牙刺瓦赤

不只兒等充燕京等處行尚書省事世祖紀憲宗令

斷事官牙魯瓦赤與不只兒等總天下財賦于燕卽

牙老瓦赤也牙老瓦赤在憲宗朝任用如故傳云不

復用者誤

贈大司徒諡忠亮 按大德三年追封冀國公延祐二

年改諡文忠

王磐傳

擢至大四年經義進士第 至大當作正大

劉肅傳

邢國公諡文獻 按肅公濬贈昭文館大學士邢國公

諡康穆

王思廉傳

帝幸白海 卽察罕腦兒也

大德元年成宗卽位 按成宗卽位在至元三十一年

次年改元元貞又二年始改大德安得繫卽位于大

攷異

元史十三

五

德元年之後乎梁德珪傳云大德開成宗卽位亦同
此失

閏復傳

卒年七十七諡文康 按袁桐撰神道碑云追封永國
公會祖衍贈大司農永安郡公諡懿德祖和叔贈昭
文館大學士永安郡公諡昭獻父文忠贈大司徒永
國公諡惠穆

劉國傑傳

爲宗王幹臣必闡赤 幹當作幹幹臣卽幹眞那顏

李德輝傳

歲癸丑憲宗封宗親割京兆隸世祖潛藩立從宜府以
德輝與李得乃爲使時汪世顯宿兵利州扼四川矜
喉以規進取 按世顯以癸卯歲卒在癸丑之前十
年傳殆誤矣攷姚燧撰李忠宣公行狀云時汪忠烈
公始宿兵利州忠烈者田哥之諡非世顯也

至元十五年再圍重慶拔之紹熙南平夔施思播諸山
壁水柵皆下而東川樞府懲前與西川相觀望致敗
惡相屬願獨軍圍合州德輝乃出合俘繫順慶獄者
縱之使歸語州將張珏以我朝含宏錄功忘過能早
自歸必取卿相與夏呂比又爲書以禮義禍福反覆

警解之珏未及報而德輝還王邸既而合州遣李興
張邵十二人訶事成都皆獲之釋不殺復爲書縱歸
說諭其將王立 按此傳全取行狀之文行狀於願
獨軍圍合州之下云初公撫蜀徑東川歸以爲重慶
帥聞受圍必徵諸屬州兵盡銳拒守合州宜虛誠使
謀人持書曉之兵隨其後亦制合一奇也卽出合俘
繫順慶獄者縱之云云蓋德輝以書招張珏在至元
十三年撫蜀之日其招降王立則在十五年拔重慶
之後兩事本不同時行狀所載乃追述前事本傳剛
去四十餘字則誤以爲卽十五年事矣不知德輝還

王邸在行院西川之前既還王邸安得猶在成都其
文已相抵牾且張珩以德祐二年

卽至元十三年

自合州入

重慶至是年元兵拔重慶珩走且被執矣珩之去合
州已將兩載安得有招珩之事乎史家之牴牾如此
十七年置行中書省以德輝爲安西行省左丞 按安
西左丞之命在招降羅施鬼國之後未及受命而卒
本紀與行狀竝同傳書於招降之前非也

張雄飛傳

張雄飛沂人 按史家書籍貫宜用當時州縣之名此
傳云張雄飛沂人趙璠傳云雲中蔚州人趙宏偉傳

云甘陵人熊朋來傳云豫章人牟應龍傳云其先蜀人後徙居吳興宇文公諒傳云今爲吳興人攷元時無此郡縣名史家失於討論也

二十一年盧世榮以言利進用 按上文已有二十一年此重出也虞集傳兩書泰定初

張德輝傳

字輝卿 當作耀卿

德輝舉魏璠元裕李冶等 元裕卽元裕之也史當稱元好問誤舉其字又脫之字傳又云與元裕北覲又云與元裕李冶游封龍山時人號爲龍山三老

德輝請老命舉任風憲者疏烏古倫貞等二十人以聞
二十人謂烏古倫貞張邦彥徒單公履張家張肅
李槃張昉曹椿年西方賓周止高逸民王博文劉郁
孫汝楫王惲胡祇遒周砥李謙魏初鄭辰也

王恂傳

父良金末爲中山府椽 按恂大父順元時贈太常少
卿中山郡公諡安定父良贈昭文館大學士中山郡
公諡端懿

十六年授嘉議大夫太史令 此脫至元二字

郭守敬傳

徐昂造宣明歷 按宣明術非徐昂所造

楊桓傳

有得玉璽於木華黎會孫碩德家者桓辨識其文曰受天之命既壽永昌 按崔彧獻傳國璽事一見於成宗紀再見於按札兒傳三見於楊桓傳四見於崔彧傳而詳略小異受天之命四字紀與二傳俱作受命于天當從之

張禧傳

從宗王合五平定河南 合五當作合丹

張萬家奴傳

張萬家奴 史失其里居

楊賽因不花傳

宋隆濟及折節等叛 成宗紀作蛇節

完顏石柱傳

完顏石柱 史失其里居

軍龍化縣與宋兵戰有功 按宋無龍化縣當是南平

軍之隆化縣也

羅璧傳

右丞阿里海牙領軍下江陵璧從禩孫降授管軍千戶

至元五年從元帥張宏範定廣南 按朱禩孫之降

在至元十二年不當書於五年之前張宏範定廣南則至元十五年事非五年也或疑五年上脫十字狀下文有至元十二年云云則是傳文本誤非脫字矣至元十二年 上文已有至元五年則此至元字可省石高山傳

在昔太祖皇帝所集按察兒孛羅窟里台孛羅海抜都闊闊不花五部撥馬赤軍 按闊闊不花傳歲丙申太宗命五部將分鎮中原闊闊不花鎮益寧濟南按察兒鎮平陽太原孛羅鎮眞定肖乃台鎮大名怯烈台鎮東平怯烈台卽窟里台也此傳述五部將之名

有字羅海拔都而無肖乃台未知孰是

孟德傳

丁巳從伯顏攻襄樊 按伯顏以至元初自西域入朝
丁巳乃憲宗之七年伯顏尚未仕于朝也

張立道傳

除忠慶路總管 忠當作中

二十七年北京地陷人民震驚命立道爲本路總管

按至元二十五年改北京爲武平路傳繫以舊名非
也世祖紀至元二十八年以武平路總管張立道爲

禮部尚書

張惠傳

丞相蒙速速愛而薦之 蒙速速疑卽孟速思世祖時
嘗命與安童竝爲丞相固辭故有丞相之稱

呂域傳

呂域字伯充 域一名端善許衡傳徵其弟子十二人
爲伴讀端善在十二人之數卽域也

譚資榮傳

子二人曰澄曰山阜 此傳附書澄事凡二百二十餘
言而良吏篇又別爲澄立傳其姓皆从言旁攷世祖
紀至元十一年副元帥覃澄王恂中堂事紀亦有懷

孟總管覃澄皆不作譚子又見交城縣萬卦山石刻

辛卯年中書省公據後列交城縣長官覃資榮名

辛卯

太宗之三年也

又濟源縣濟瀆廣有中統元年祭濟瀆碑後

列懷孟州總管覃澄名又中統五年濟祠投龍簡碑
文稱總管覃侯後列宜授懷孟路總管覃澄名可證
資榮父子本姓覃而傳作譚者誤也

王暉傳

祖宇仕金官敦武校尉父天錚金正大初以律學中首

選按王宇元贈集賢侍讀學士追封太原郡侯諡

敏懿天澤贈大司農追封太原郡公諡莊靖

陳祐傳

歲癸丑穆王府署祐爲其府尚書王旣分土於陝洛表
祐爲河南府總管 按睿宗子末哥大王丁巳年分
撥河南府五千五百五十二戶末哥一作穆哥亦作
摩哥傳所云穆王者卽穆哥也依史例當稱穆哥王
府傳蓋沿王暉所作神道碑文而不知其非史法也
天祥 萬戶鄭鼎臣爲宣慰使 卽鄭鼎也

劾平章岳東木 卽要東木

劉宣傳

時江浙行省丞相松古臺 卽松兀台

何榮祖傳

追封趙國公諡文憲 按虞集有中書平章政事何榮

祖諡忠肅議則榮祖嘗諡忠肅矣

賀仁傑傳

德輝分守成都獲王立鈔卒張合

呂城傳作張郃

縱之使諭立

降立復遣張合等奉蠟書告德輝能自來即降德輝

遂從五百騎至釣魚山與東院同受立降東院復奏

誅立并言德輝越境邀功下立長安獄西院從事呂

或即呂城

至都以兵事告許衡許衡告仁傑仁傑爲言

於帝 此事已見李德輝及呂城傳惟張合呂傳作

郤李傳作卻則轉寫之誤

賈昔刺傳

子丑妮子 虞集傳宜徽使賈公碑作丑鈕子

子虎林赤 碑作忽林赤

子禿堅不花 碑作禿里堅不花

加贈其曾祖昔刺 碑云大德八年有詔褒贈行封自

其曾祖以下凡三等而三世夫人皆有號諡當是時

推恩之典未大行獨二三世家得之而夫人之諡尤

異典也據碑昔刺夫人諡孝節丑妮子夫人毛氏諡

靖淑忽林赤諡忠靖夫人忽八察封臨汾王夫人傳

皆失書

石抹明里傳

石抹明里契丹人姓石抹 按遼金人皆繫姓于名此傳既書石抹明里又云姓石抹重複非史法

王伯勝傳

元貞元年進階嘉議大夫成宗卽位復進通議大夫

按成宗卽位在至元三十一年次年乃改元元貞傳書成宗卽位于元貞元年之下誤也其下又書五年九年則改元大德以後事傳又脫大德字

高源傳

子夢弼良弼公弼 按列傳附書子孫有名而無事狀者如覃澄孫男三人曰忠曰質曰文楊湜孫貞姚燧子燠圻城孟祺子二人遵遁許楫子餘慶重慶崇慶餘失其名此類既不能稽其事迹徒費筆墨殊可省也

元史十三終

元史十四

廿二史攷異九十九

錢大昕學

程鉅夫傳

叔父飛卿 按鉅夫曾祖子明諡安僖祖德秀諡簡懿
皆追封楚郡公父翔卿追封郢國公諡孝肅進封楚
國公見危素撰神道碑

丞相火禮霍孫 卽和禮霍孫

又命爲御史中丞臺臣言鉅夫南人且年少 按元時
有漢人南人之別漢人謂中原之人向屬金者南人
謂江淮以南向屬宋者世祖時南人有入臺省者成

攷異

元史十四

宗以後省臺有漢人無南人順帝時南人入中書者
惟危素一人爾

趙孟頫傳

帝嘗問葉李留夢炎優劣按此事又見葉李傳雖詳
略不同終不免重出之病

鄧文原傳

父漳徙錢塘按漳父昭祖追封南陽郡侯漳追封南
陽郡公

至順五年按至順四年改元元統至順無五年傳誤
齊履謙傳

字伯恆一傳失書其里居及蘇天爵撰履謙神道碑云
大名人

燕公楠傳

公楠薦伯顏不灰閣里 不灰卽不忽木閣里卽徹里
姚燧傳

衡以國子祭酒教貴胄奏召舊弟子十二人燧自太原
驛致館下 按姚燧撰白棟墓碣稱魯齋先生奏召
舊弟子散居四方者以故王梓自汴韓思永蘇郁自
一大名耶律有尚自東平孫安與高凝燧燉自河內劉
季偉呂端善劉安中自秦獨公自太原十二人皆驛

致館下蓋燧由河內應召至闕下所云公者謂白棟也傳謂燧自太原者誤

或謂世無知燧者曰豈惟知之讀而能句句而得其意者猶寡燧曰世固有厭空柔而思聞鼓缶者乎狀文章以道輕重道以文章輕重彼復有班孟堅者出表古今人物九品中必以一等置歐陽子則爲去聖賢也有級而不逮其文雖無謝尹之知不害于行後豈有一言幾千古而不聞之將來乎按此文蓋取燧所撰送暢純甫序而稍剛潤之其序云純甫自言得余隻字一言不棄而錄之又言世無知公者豈惟知

之讀而能句句而得其意者猶寡嗚呼世固有厭空
桑之瑟而思聞鼓缶者乎然文章以道輕重道以文
章輕重世復有班孟堅者出表古今人物九品之中
必以一等置歐陽子則爲去聖賢也有級而不遠其
文雖無謝尹之知不害于行後猶以失之爲悲下下
之外豈別有等置余爲哉則爲去聖賢也無級而絕
遠其文如風花之逐水霜葉之委土朝夕腐耳豈有
一言之幾于古可聞之將來乎純甫獨信之自余不
可不謂之知己足爲百年之快恐純甫由此而取四
海不知言之非也此序意謂歐陽文以道重雖無謝

尹之知不害于行後而已所爲文無一言幾於古雖有純甫之知恐四海不以爲知言皆自謙之詞而以謝希深尹師魯比純甫以歐陽自況則言外之旨也如傳所云似謂言之幾于古者可以聞之後來不惟語拙而累而于燧作序之旨相去徑庭矣史家述當時之言小有剛易固所不免然汰其繁辭要勿失其本旨若乃句讀之不通而妄加點竄欲以備石室金匱之藏與三史並列毋乃不知量之甚乎

劉賡傳

五世祖逸以郡吏治獄有陰德祖肅爲右三部尚書

按列傳第四十七卷已爲肅立傳逸之陰德當著于肅傳

郝天挺傳

父和上拔都魯 卽和尚拔都

天挺與少保張閻等 卽章閻

張珪傳

子六人 按文宗紀天歷元年十月紫荊關潰卒南走保定因肆剽掠同知路事阿里沙及故平章張珪子武昌萬戶景武等率民持挺擊死數百人也先捏以兵至保定殺阿里沙及張景武兄弟五人御史臺言

攷異

元史十四

四

也先捏不俟奏聞擅殺官吏珪父祖三世爲國勳臣
設使珪子有罪珪之妻女又何罪焉今旣籍其家又
以其女妻也先捏誠非國家待遇勳臣之意帝曰卿
等言是命中書革正之此事當載于珪傳

李孟傳

曾祖執金末舉進士 按孟之曾祖執祖昌祚父唐三
世皆贈韓國公執諡康惠昌祚諡文靖唐諡忠獻

曹伯啓傳

子六人孫十人皆顯仕 按曹鑑撰神道碑子震亨謙
亨秦亨皆前卒而謙亨并未得官則六人之中已有

三人不登顯仕者矣碑稱孫八人而傳云十人則或有生于立碑之後者

謝讓傳

二年朝廷以吏多滯事。按此傳自仁宗卽位以後書二年四年不著年號史脫文也

趙師魯傳

霸州文安縣人 縣字衍

張思明傳

及拜住爲左丞相與帖木迭兒各樹朋黨賊害忠良思明懼禍及累表辭不獲後竟誣以不支蒙古子女口

糧餓死四百人遂廢于家 按拜住賢相何至有賊
害忠良之事此史之誣也攷拜住傳鐵木迭兒引參
知政事張思明爲左丞以助己思明爲盡力忌拜住
方正每與其黨密語謀中害之二年七月奏召思明
詣上都數其罪杖而逐之與此傳所云正相矛盾文
宗紀天歷三年御史劾奏張思明在仁宗朝阿附權
臣鐵木迭兒開謀兩宮仁宗灼見其姦旣行黜降及
英宗朝鐵木迭兒再相復授爲左丞稔惡不悛竟以
罪廢今又冒居是官宜從黜罷詔罷之狀則思明之
爲人大略可知本傳多曲筆未足深信

吳元珪傳

至治元年英宗卽位 按英宗卽位在延祐四年其明

年改元至治不當繫卽位于至治元年之下

王約傳亦有至

治元年英宗卽位之文

追封趙國公諡忠簡 按元珪父鼎亦贈中書右丞壽

國公諡憲穆

陳顥傳

遂爲清州人 按顥曾祖課贈昭文館大學士趙郡公

諡通憲祖某大司農卿趙郡公諡康靖父國瑞大司

徒封趙國公見程鉅夫撰陳氏先德碑

梁曾傳

除知南陽府唐鄧二屬州爲襄陽府所奪曾按圖經稽
國制以聞事得復舊 按地理志南陽府金爲申州
至元八年升爲南陽府以唐鄧裕嵩汝五州隸焉無
改隸襄陽之事

劉敏中傳

濟南章邱人 按敏中祖鼎贈禮部尚書彭城郡侯諡
獻穆父景石濱州教授贈參知政事彭城郡公諡文
靖見雪樓集

王約傳

承旨火魯火孫以司徒開府 卽和禮霍孫

賀勝傳

初開平人張弼家富弼死其奴索錢民間弗得歐負錢者至死有治其獄者教奴引弼子井下之獄丞相鐵木迭兒受其賂六萬緡終不爲直勝聞弼事以語御史中丞楊朶兒只朶兒只以語御史玉龍帖木兒徐元素遂劾奏丞相逮治其左右 按鐵木迭兒傳云上都富人張弼殺人繫獄鐵木迭兒使家奴脅留守賀伯顏卽賀使出之伯顏持正不可撓而朶兒只已廉得丞相所受張弼賂有顯徵乃與蕭拜住及伯顏

奏之

楊朶兒只傳
與此略同

與此傳互異彼云弼殺人繫獄此

云弼家奴殺人而引其子彼云鐵木迭兒者勝使出
其獄不可又與楊朶兒只共奏之此云勝聞弼事以
語朶兒只不與同奏又此傳云鐵木迭兒受賂六萬
緡鐵木迭兒傳云受弼鈔五萬貫而楊朶兒只傳云
受弼贓鉅萬萬皆其異也

楊朶兒只傳

少孤與其兄皆幼

按朶兒只祖世刺贈夏國公諡忠

定父式願唐古台贈夏國公諡康靖兄教化湖北道
廉訪使贈夏國公諡襄敏見道園學古錄

耶律希亮傳

抵葉密里城乃定宗潛邸湯沐之邑也 按憲宗二年

遷諸王脫脫于葉密立地卽葉密里也

定宗幼子大名王 按宗室表定宗三子長忽察大王
次臘忽太子次禾忽大王此大名王當卽禾忽也因
其分地在大名卽以爲王號猶只必帖木兒稱永昌
王也上文有宗王火忽疑卽一人火禾音相近

趙世延傳

其先雍古族人居雲中北邊曾祖黜公爲金羣牧使太
祖得其所牧馬黜公死之祖按竺通幼孤鞠于外大

父术要甲謬爲趙家因氏爲趙 此文已見按竺通
傳惟敘黜公事互異

元明善傳

居清河者至明善四世矣 按明善父貞追封清河郡
公諡孝靖祖海追封清河郡侯諡貞惠見吳澄集

虞集傳

使貴近阿營夔嶮傳旨 阿營卽阿榮也

奎章閣大學士忽都魯篤彌實 上文有大學士忽都
魯都兒迷失卽一人也一篇之中稱名互異

揭傒斯傳

父來成宋鄉貢進士 按來成追封豫章郡公賜號貞

文先生

宋本傳

旭減饒奏釋之 卽旭遺饒

謝端傳

史杜宣慰荆南數加延禮薦之姚樞樞方以文章大名
自負少所許可以所爲文跡端端一讀卽能指撻其
用意所在樞歎獎不已 按姚樞當是姚燧之譌樞
本不以文章自負且樞卒于至元十七年是時謝端
甫生兩歲無緣得見樞也後讀蘇天爵所撰神道碑

正作文公燧竊喜鄙見之不謬

李好文傳

西蜀奉使以私憾摭拾廉訪使曾文博僉事兀馬兒王武事文博死兀馬兒誣服武不屈以輕侮抵罪好文曰奉使當問民疾苦黜陟邪正今行省以下至于郡縣未聞舉劾一人獨風憲之司無一免者此豈正大之體乎率御史力辨武等之枉并言奉使不法者十餘事 按此時奉使西蜀者荅爾麻失里王守誠也守誠傳云初四川廉訪使某與行省平章某不相能誣宣使蘇伯延行賄于平章某瘐死獄中至是伯延

親屬有愬會茶鹽轉運司官亦訟廉訪使累受金廉
訪使倉皇去官至揚州死副使以下皆以事罷憲史
四人奉差一人籍其家而竄之餘皆斥去卽好文所
云風憲之司無一免者也彼傳稱其風采聳動天下
論功爲諸道最而此傳言其私憾撻拾人罪并諸不
法事褒貶互異如此何以取信後世乎

李术魯神傳

從京兆蕭軒游翰林學士承旨姚燧以書抵軒曰燧見
人多矣學問文章無足與子輩比者于是軒以女妻
之按蘇天爵撰神道碑云貞隱李先生鄧名士

也公從學詩賦同門莫及復從翰林姚文公學古文
文公竒之以書抵貞隱日子翬談論鋒出其踐履一
以仁義爲準文章不待師傅而能後進無是倫比于
是貞隱以女妻之又云公配李氏貞隱先生之女狀
則翀之妻實李氏非蕭氏矣翀嘗從學于麴無以女
妻翀之事傳誤

王都中傳

俄以爲國信使宣諭日本至其境遇害于海上 按積
翁追封閩國公諡敬愍改諡忠愍

呂思誠傳

吏部尚書俛哲篤左司都事武祺等建言更鈔法 按
思誠與俛哲篤論鈔法已見食貨志

汪澤民傳

徽之婺源州人宋端明殿學士藻之七世孫也 按宋
景濂撰澤民神道碑敘其里居世系甚悉史稱藻七
世孫據碑乃藻兄槃之七世孫汪氏自五代初遷婺
源之還珠里傳十世至穀又自婺源遷饒州德興之
龍溪卽槃與藻之父也槃子慥又自德興遷宣州之
宣城子孫遂爲宣城人史舍宣城而繫以婺源亦非
也澤民壽八十三而傳作七十追封譙郡公而傳作

譙國郡公皆史之誤澤民族子克寬預修元史宋景
濂又爲總裁官而史文舛誤如此蓋官書不出于一
手而意在速成往往有此失也

事連廣東廉訪副使劉珍 碑作劉安仁

成遵傳

至正十七年升中書左丞階資善大夫分省彰德 按

順帝紀至正十九年詔中書右丞也先不花御史中

丞成遵奉使宣撫彰德大名廣平東昌東平曹漢等

一處獎勵將帥

百官志同

是遵之往彰德乃奉使宣撫非分

省也又以宰相表百官志攷之是年有分省太原者

矣則平章臧卜也有分省濟寧者矣則右丞失烈門
參政賈魯也有分省陵州者矣則平章荅蘭參政俺
普崔敬也若彰德之有分省則在至正十五年其任
分省者前有右丞臧卜左丞烏古孫良楨兩人繼有
參政月倫失不花陳敬伯兩人遵未嘗一日預分省
之事也遵以至正十七年拜左丞紀表失載其月日
而由左丞除御史中丞則表繫之九月蓋以中丞奉
使使旋仍入中書傳既漏除中丞一節又誤書奉使
爲分省皆失之甚者也凡以省官出鎮謂之分省遵
既除中丞以行則是臺官非復省官故知本傳所書

分省者傳聞之訛也

曹鑑傳

泰定七年 按泰定無七年七字誤

劉哈刺不花傳

初哈刺不花與信州人倪晦字孟晰同事泰不花 卽

上文所稱河南平章政事太不花也前作太後作泰

於例未畫一

元史十四終

元史十五

廿二史攷異一百

錢大昕學

儒學傳一

許謙 其先京兆人九世祖延壽朱刑部尚書八世祖仲容太子洗馬仲容之子曰洗曰洞洞由進士起家以文章政事知名于時洗之子實事海陵胡瑗能以師法終始者也由平江徙婺之金華至謙五世爲金華人 此傳敘述先世凡八十言乃誌狀之文無當于國史當盡刪之但云婺州金華人

甫能言世母陶氏口授孝經論語 按黃潛撰墓誌云

攷異

元史十五

考諱觥無子以從父兄貢士日宣之次子嗣卽先生也先生甫能言貢士君之夫人陶氏授以孝經論語則陶氏實謙之本生母傳云世母者攷之未審爾

同郡朱震亨字彥修按彥修精於醫而傳略不及之雖云重儒學而輕方技朕舍其可傳而錄其不必傳亦通人之蔽也

儒學傳二

程端學登至治辛酉進士第按端學以泰定甲子登第見歐陽原功所撰墓志史誤

陳旅適御史中丞馬雍古初常使泉南雍古二字

當剛

字文公諒 至順四年登進士第 卽元統癸酉歲也

良吏傳一

譚澄 以其弟山代爲交城令 山下脫阜字

以疾卒年五十八 按山西通志追封恆農郡公諡忠
宣子克修陝西漢中道提刑按察使贈禮部尚書追
封恆農郡侯諡文憲克思中山知府追封恆農郡侯
克修子忠南康府判官質兵部侍郎文河南宣慰使
克思子敬漢陽知府

卜天璋 丞相順德王當國 當稱哈刺哈孫

良吏傳二

段直 至元十一年河北河東山東盜賊充斥直聚其鄉黨族屬結壘自保世祖命大將略地晉城直以其衆歸之其後論功行賞分土世守命直佩金符爲澤州長官 今澤州鳳臺縣有劉因所撰直墓碑文字完好所書事迹與傳略同而傳所書年代與碑大相刺謬碑云甲戌之秋南北分裂河北河東山東郡縣盡廢甲戌者元太祖之九年金貞祐二年也是歲元兵圍中都金宣宗遷汴故有南北分裂之語而傳乃云至元十一年河北河東山東盜賊充斥以其歲亦

在甲戌也曾不思至元之初境內寧謐河北諸路安
有寇盜充斥之患乎碑又云天子命太師以王爵領
諸將來洛地公遂以衆歸之謂太師國王木華黎承
制時也而傳乃云世祖命大將略地晉城曾不思世
祖時晉城久入版圖安得有命將略地之事乎碑作
于世祖朝其文云今上在潛邸命提舉本州學校未
拜而卒然則直卒于憲宗朝未嘗事世祖矣蓋由史
臣不學誤切甲戌爲至元之甲戌相差一甲子而不
悟也

未拜而卒

年六十有五子紹隆嗣官至臺州知州傳

皆失書

林興祖 至治二年登進士第 按至治二年壬戌非
科舉之歲當有誤

忠義傳一

李伯溫守賢之孫毅之子也 按李守賢傳末亦云子
毅子十一人伯溫見忠義傳與此文合及攷其傳首
云金大安初守賢暨兄庭植弟守正守忠從兄伯通
伯溫歸款則伯溫乃守賢之從兄前後自相矛盾今
據此傳稱伯溫長兄惟則次伯通歲甲戌錦州張致
叛國王木華黎命擊之大戰城北伯通死焉若伯溫

爲守賢之孫則伯通亦守賢孫矣守賢以甲午歲卒年四十六則甲戌歲年僅二十六安得有孫且能履行陳乎毅卒于至元七年庚午年四十九溯其生年當在壬午守忠以丁亥歲被執伯溫亦失利死節其時毅才六歲耳而史以伯溫爲毅子何其謬乎推求其故此傳之謬實因於守賢傳狀彼傳云伯溫見忠義傳者因篇中有與從兄伯通伯溫歸款之文牽連書之非謂伯溫在毅子十一人之數也史家不諳文義遂至謬妄乃爾

子守正自幼時嘗質于木華黎 據李守賢傳則守忠

守正與伯溫爲從昆弟此傳旣云平陽已陷弟守忠
被執伯溫謂左右曰吾兄弟仗節擁旄受方面之寄
吾弟已被執我不可再辱則亦以守忠爲伯溫弟矣
守忠爲守正之兄則守正亦伯溫之弟而此乃云子
守正竟似守正守忠皆伯溫子一篇之中自相矛盾
如此

歲庚寅上黨晉陽合兵攻汾州將陷守正以義赴援

按守忠死於丁亥四月而守正之戰歿更在其前庚
寅在丁亥後四年守正死已久矣此事有誤或云當
爲庚辰之譌

平陽公胡景山以青龍堡降 太祖紀木華黎傳俱作
胡天祚景山蓋其字也

丁亥夏四月金紇石烈真襲擊平陽行營招討使權國
王按察兒于洪洞 按金史紇石烈牙吾塔傳正大
四年牙吾塔復取平陽正大四年卽丁亥歲也真與
牙吾塔殆一人而兩名乎

石珪 按珪起於盜賊背金歸宋又背宋降元雖死於
非命豈宜廁諸忠義之列

耶律忒末 父丑哥仕遼爲都統遼亾不屈節夫婦俱
死焉金主憫其忠義授忒末都統歲甲戌國兵至金

遷于汴志未及子天祐率衆三萬內附 按遼亾於
乙巳歲至元太祖甲戌相距九十載使志未果於遼
亾時授官計其年當近百歲豈復能從征又閱十餘
年而戰沒乎此與移剌捏兒事蹟不同而妄誕相似
史臣于時代修短且茫然不知而任以筆削之職欲
其無失實難矣

伯八兒合丹氏 按目錄以伯八兒標題似合丹爲伯
八兒之氏今檢傳中兩舉伯八名皆不連兒字又元
祕史載蒙力克額赤格事甚詳卽此傳之明里也赤
哥也祕史謂其族爲晃合壇氏丹壇聲相近則兒乃

晃字之譌

合刺普華 僕文質子六人僕玉立僕直堅僕哲篤僕朝吾僕列篋皆第進士 按歐陽原功僕氏家傳云僕氏先世嘗從其主居僕鞏河因以僕爲氏僕玉立官翰林待制僕直堅宿松縣達魯花赤僕朝吾同知濟州事僕列篋河南路經歷

忠義傳二

李齊 廣平人 按元統元年進士錄李齊貫保定路祁州蒲陰縣匠戶此云廣平恐誤

郭嘉 祖昂父惠俱以戰功顯 按列傳第五十二卷

有郭昂官廣東宣慰使子惠江西廉訪僉事當卽嘉之祖與父也彼傳稱彰德林州人此云濮陽人籍貫小異

喜同 時有襄陽錄事司達魯花赤塔不台字彥暉者按元統元年進士錄有塔不歹字彥輝貫東昌路聊城縣唐兀氏蓋卽其人也

忠義傳三

伯顏不花的斤 駙馬都尉中書丞相封高昌王雪雪的斤之孫駙馬都尉江浙行省丞相封荆南王朶爾的斤之子也 按諸王公主二表及巴而朮阿而忒

的斤傳俱不載雪雪的斤朶爾的斤之名葉盛水東
日記引高昌王世勛碑云帖木兒補化有二子長不
荅失里嗣亦都護高昌王次伯顏不花的斤爲太常
鮮于樞甥官浙東宣慰使如碑所言似朶兒的斤與
帖木兒補化卽是一人今攷元文類載虞集高昌王
世勛碑不敘帖木兒補化之子葉文莊所見豈別一
碑邪

丑閻 字時中蒙古氏登元統元年進士第 按是榜
有兩丑閻第二甲弟十二名字時中貫昔寶赤身役
唐兀氏第三甲弟三名字益謙貫河南淮北蒙古軍

戶哈刺魯氏此字時中者乃唐兀氏非蒙古氏

忠義傳四

送里彌實 曰海魯丁者官信州 按海魯丁事見伯

顏不花的斤傳

孝友傳一

趙一德 拜請於其主鄭阿思蘭 卽鄭阿兒思蘭也

尹莘汴梁洧川人 按文宗紀至順元年五月以汴梁

尹華孝行旌其門疑卽一人字形相涉而譌

孝友傳二

劉琦岳州臨湘人生二歲而母劉氏遭亂陷于兵 按

傅與彌有旌孝圖集序云岳陽民張琦生二歲而失
母于兵長而求之三十年不得而不倦風雨往復晨
昏號呼鬼神爲愁行路相泣卒能歸其母使二親終
壽于其室家暮年二親病臂則子爲父冠帶婦爲姑
櫛洗凡所順承惟其志旣歿葬祭情溢于禮遠近莫
不稱其孝焉事聞朝廷命有司旌其門且復其家與
史所載劉琦事略同而姓則互異似當從傅集張琦
爲正蓋琦母氏劉同姓婚姻世不常有也

隱逸傳

張特立 按特立在金史循吏傳然兩傳所載事迹不

同可以互相攷證

白撒訴於世宗言特立所言事失實世宗宥之世宗

當作哀宗據金史稱白撒治特立左遷邳州軍事

或作

士判官杖五十則亦未嘗宥也

列女傳一

元受命百餘年女婦之能以行聞於朝者多矣不能盡書按仁宗紀皇慶二年十月旌表高州民蕭父妻趙氏貞節免其家科差延祐二年八月旌表貴州達魯花赤相兀孫妻脫脫真死節仍俾樹碑任所文宗紀天歷二年正月衛輝安寅妻陳氏河間王成妻劉

氏冀寧李孝仁妻寇氏濮州王義妻雷氏南陽郟二
妻張氏懷慶阿魯輝妻翟氏皆以貞節旌其門至順
元年五月龍興張仕興妻鄒氏奉元李郁妻崔氏以
志節旌其門六月旌表真定梁子益妻李氏等貞節
七月大同李文實妻齊氏河南閻遂妻楊氏大都潘
居敬妻陳氏王成妻高氏以志節順德馬奔妻胡潤
奴真定民妻周氏冀寧民妻魏益紅以夫死自縊殉
葬並旌其門九月辰州萬戶圖格里不花母石抹氏
以志節旌其門十二月冀寧路梁世明妻程氏中興
路伯顏妻阿迭的以志節旌其門二年正月旌大都

大興縣郭仲安妻李氏貞節二月旌鞏昌金州民杜
祖隆妻張氏大都民劉德仁妻王氏貞節三月旌同
知大都府事忙兀禿魯迷失妻海迷失山丹州郝榮
妻李閔故戶部主事趙野妻柳氏貞節四月甘州阿
兒思蘭免古妻忽都的斤以貞節旌其門五月旌濟
南章邱縣馬萬妻晉氏志節六月旌大都右警巡院
胡德妻曹氏貞節七月大寧和衆縣何干妻柏都賽
兒夫亾以身殉葬旌其門八月旌揚州路呂天麟妻
韋氏貞節三年二月旌晉寧路沁州劉璋妻張氏志
節旌濟州任城縣王德妻秦氏婺州路金華縣吳墳

妻朱氏廬州路高仁妻張氏甘州路岳忽南妻失林
蓋州完顏帖哥住妻李氏志節三月旌大都良鄉縣
韋安妻張氏貞節五月旌探祿妻靈保賢孝六月旌
歸德府永城縣民張氏孝節皆傳所謂不能盡書者
然詳於紀而略於傳更非體矣

關文興妻王氏 至順三年事聞贈文興侯爵諡曰英
烈王氏曰貞烈夫人 按順帝紀元統二年贈文興
英毅侯王氏貞烈夫人英烈英毅諡號小異

列女傳二

也先忽都蒙古欽察氏 按欽察是色目非蒙古

釋老傳

帝師八思巴 世祖紀作八合思八

乃以其弟亦憐真嗣焉 世祖紀作亦鄰真又作亦憐

吉

蒼兒麻八刺乞列嗣 世祖紀作蒼耳麻八刺刺吉塔
亦攝思連真嗣 世祖紀作亦攝思憐

乞刺斯八斡節兒嗣 成宗紀作合刺思八斡節而又
作吃刺八思斡節兒

都家班嗣皇慶二年卒相兒加思嗣 按成宗紀大德

九年正月帝師輦真監藏卒三月以吃刺八思斡節

兒姪相加班爲帝師仁宗紀皇慶二年九月以相兒
加思巴爲帝師中間不書相加班之卒疑相兒加思
巴與相加班卽一人

旺出兒監藏嗣泰定二年卒 按泰定帝紀泰定四年
二月帝師參馬亦思吉思卜長出亦思宅卜卒疑卽
旺出兒監藏也其卒在泰定四年傳作二年誤

公哥列思八冲納思監藏班藏卜嗣 泰定紀八作巴
以輦真吃刺失思嗣 文宗紀無失字

姦臣傳

阿合馬回紇人也 按回紇唐時舊名後稱回鶻唐末

失其土而遷於北庭元時音轉爲畏兀或作畏吾兒
與回回非一種輟耕錄載色目三十一種有畏吾兀
又有回回元史太祖紀汪罕走河西回鶻回回三國
薛塔刺海傳從征回回河西欽察畏吾兒諸國世祖
紀河西回回畏吾兒等依各官品充萬戶府達魯花
赤文宗紀各道廉訪司官用蒙古二人畏兀河西回
回漢人各一人明史哈密傳其地種落雜居一曰回
回一曰畏兀兒一曰哈刺灰其頭目不相統屬又云
哈密故有回回畏兀兒哈刺灰三種回紇與回回不
宜混而一之明矣阿合馬本出回回故世祖言回回

人中阿合馬才任宰相而傳稱回紇人蓋明初史臣亦昧於回回回紇之有別也

江淮行省平章阿里伯 阿里伯元史無傳爲阿合馬所譖死後追諡忠節見柳貫集

右丞燕帖木兒 卽崔斌也

搠思監 野先不花之孫 卽也先不花

叛臣傳

太祖十六年全叛宋舉山東州郡歸附太師國王孛魯承制拜全山東淮南楚州行省 按李全之降據太

祖紀在二十一年

丙戌歲

此誤且木華黎以太祖十八

年卒而字魯嗣之若云十六年則字魯未爲國王也
阿魯輝帖木兒 曲春傳太平太平傳帖木兒赤而阿
魯輝帖木兒襲其封 按諸王表陽翟王太平泰定
元年襲封曲春帖木兒赤則失其封年而承襲之次
則與此傳正合宗室世系表以太平爲曲春兄帖木
赤兒卽帖木兒赤爲曲春之子至阿魯輝帖木兒與其弟
忽都帖木兒則兩表不見其名

高麗傳

太祖十三年帝遣哈只吉劄刺等領兵征之高麗王名

闕

奉牛酒出迎王師 按太祖紀稱高麗王瞰降請

歲貢方物攷朝鮮史太祖十三年爲王噉卽位之五年傳乃缺其名何邪

皇太弟國王及元帥合臣 合臣卽哈只吉也太祖紀及朝鮮史俱作哈真

命撒禮塔征其國 洪福源傳作撒里塔

十月禩入朝 按是年六月禩親朝此又云禩入朝蓋以六月朝上都十月入朝大都非旣還國而又入朝也

立禩庶族承化侯爲王 承化侯名溫見朝鮮史

皇女忽都魯揭里迷失下嫁于世子懋 公主表作忽

都魯堅迷失

子諫復襲王位成宗初年尚寶塔實憐公主表作卜
荅失利本紀作普達實憐又作寶荅失憐

生子燾燾受遜位以仁宗皇慶二年四月封高麗國王
是年其弟曷立爲世子按本傳述授受事多踈舛
今據朝鮮史攷之蓋諫以至大三年封瀋王入朝皇
慶二年遣歸就國乃請辭位以其長子燾爲征東行
省左丞相高麗王而以姪延安君曷爲世子曷爲瀋
王世子非爲高麗王世子也

燾傳其弟曷按延祐三年璋請傳瀋王位于世子曷

許之髡所受者瀋王非高麗王又受於璋非受於燾也燾嗣高麗王順帝至元五年薨子禎嗣至正三年薨子昕嗣八年薨以禎庶子眠嗣十一年詔廢眠而立禎之母弟祺其承襲之次見於朝鮮史班班可攷髡雖有奪嫡之志迫於衆議終不得逞而史乃云燾傳其弟髡何其謬乎

諛則更名章云 章當作璋高麗國王自尚主以後子孫多以國語命名故常有兩名如璋曰益智禮普化燾曰阿刺忒納失里禎曰不荅失里昕曰八禿麻朵兒只祺曰伯顏帖木兒又名顯古史家不能盡載今

參取朝鮮史以博異聞

謹按遼金元三朝人名官名地名舊史頗多舛譌
由當時史臣未通繙譯以至對音每有窒礙且有
一人而彼此互異者現奉

聖旨飭令館臣逐一釐定足洗向來沿襲之陋是書成
於乾隆庚子所據係

武英殿舊刊本俟

頒下定本到日遵照改正辛丑三月大昕書

元史十五終